

四庫全書

史部

欽定四庫全書

浙江通志卷二百二十一

祠祀

五

紹興府

山陰縣

附郭

會稽縣

附郭

先農壇 在五雲門外一都一畝

國朝雍正五年山陰縣知縣石秘會稽縣知縣張我觀

奉文建立壇宇并合置藉田九畝八分

社稷壇 紹興府志在迎恩門外數百步運河之南

山陰會稽之祭附焉地隸山陰

陸游社壇記縣社在禮禋坊曰社曰

稷曰風師曰雨師曰雷神凡五壇皆廢不治四明王君時會之來為令乃即其地為垣八十丈築室四楹有門以時其啓閉有庫以儲其器物用宋之櫟豐之枌榆故事藝松五十凡稽合制度藁枯莞席幣篚樽俎豆籩簋勺羃莫不如式案盛酒醴牲牢莫不共給獻有次祝有位齋有禁省饌食爵奠幣飲福望燎望瘞有儀祝事各以其日禮成而退無違者

國朝康熙二十九年知府李鐸重建於社旁隙地種松

竹植桑柘歲取其租以共修葺五十四年知府俞卿重修

風雲雷雨山川壇 於越新編在會稽山之陰紹興府志山陰會稽附焉久圯

國朝康熙二十九年知府李鐸會稽知縣王風采重建郡厲壇 紹興府志山陰會稽共祀在昌安門外久圯其地為民居侵佔

國朝康熙五十六年知府俞卿復之修其祭壇

城隍廟 山陰縣志在臥龍山麓山之上下各有殿

上殿西偏有星宿閣前列梅嶺諸峯最為勝絕再

西有湖山一覽堂下瞰王公池前帶鑑湖下殿之

東有思敬堂前有池曰凝碧紹興府志神姓龐諱

玉為越州總管惠澤在民既卒郡人追懷之祠以

為城隍神梁開平二年吳越王錢鏐奏為崇福侯

錢鏐城隍廟記浙東地號奧區古之越國當舟車
輻湊之會是江湖衝要之津自隋末移築子墻因
遷公署據臥龍之高阜雄堞穹崇對鏡水之清波
風烟爽朗緬惟深固宜叶冥扶故唐右衛將軍總

管龐君玉頃握圭符首臨戎政披榛建府吐哺綏
民仁施則冬日均和威肅則秋霜布冷堵牆愛戴
黔庶謠謠尋而罷軍興嗟餘芳不泯衆情追仰共
立嚴祠鎮都雉之崗巒宰軍民之禍福殿堂隆邃
儀衛精嚴式修如在之儀仰托儲靈之應往載累
生劉氏妖起羅平子躬稟睿謀恭行天討數年擢
甲兩復越檣皆資盼賚之功以就戡平之業特為
重增儀像嚴潔牲牢邇來四野無塵重門罷柝丁
卯歲揚旌東渡巡撫軍民躬奠椒漿目瞻靈像每
暢吳風越俗共欲道泰人安昔為兩鎮之疆今作
一家之慶遂馳箋表請降封崇所冀朝恩與漢牧
齊標美稱共秦繇對聳尋蒙天澤果賜允俞頒崇
福立嘉名陞五等之尊爵其所奉勅命員列如左
梁開平勅鎮東軍城隍神龐玉前朝名將劇郡良
材頃因剖竹之辰實有披榛之績創修府署綏輯
吏民豈獨遺愛在人抑亦垂名終古況錢鏐位隆

三鎮功顯十臣能求福而不回致效靈而必應願
加懿號以表冥符宜旌茂業之功用顯優隆之澤
宜賜號
崇福侯
宋紹興元年賜額顯寧封昭佑公三十年

加號忠順乾道五年加號孚應八年加號顯惠淳
熙三年封忠應王後又加號昭順靈濟孚佑萬歷
紹興府志明洪武三年去前代封號稱紹興府城
隍之神萬歷十二年下廟殿災知府蕭良幹重新
之
謝遷謁廟詩迤邐岡巒隔市塵嵯峨臺殿集高
真天低象緯先分曙地接蓬壺獨貯春大府建
牙森榮戟仙壇煮石足荆榛滿前
多景真奇絕老眼于今又一新

國朝康熙五十四年知府俞卿重修上下二廟其上廟
星宿閣久燬惟池基畧存

山陰縣城隍廟 山陰縣志明嘉靖二十一年知府
張明道知縣許東望新建於太清宮側後知縣耿
庭栢移建於演武場東紫金坊

國朝康熙四十年知縣顧彰修

會稽縣城隍廟 會稽縣志在縣東二十餘步正德
十五年知縣徐岱修嘉靖十九年知縣吳希孟重

修

國朝雍正五年知縣張我觀修

旗纛廟

舊浙江通志明洪武初征南副將軍廖永

忠建在紹興衛西南陬歲霜降鎮將衛所守禦官
祭之紹興府志後移於會稽縣東南法濟里

南鎮廟

萬厯會稽縣志在會稽山之陰周禮職方

氏揚州之鎮山曰會稽秦併天下以會稽為名山
祭用牡犢圭璧晉咸和八年從祀北郊隋開皇十

四年就山立祀唐天寶十年封永興公以南郊迎
氣之日祭宋淳化二年從秘書少監李至言以立
夏日祀永興公於越州後加封永濟王元改封昭

德順應王

鄧文原南鎮廟碑東南控帶江海層岡
峭嶺圭立屏峙莫可殫狀而會稽之山

秀峯無儔明靈所司由隋唐暨宋視號祭式公王
次升大德己亥詔尊南鎮會稽山為昭德順應王
與嶽瀆同祀至大己酉嘉議大夫多爾濟來守茲
土進謁祠下顧視興慨曰守臣職在藩宣事神訓
民曷敢不欽厥事乃集羣議將大撤而新之請於
帥府給緡錢二萬五千四百有奇經度故址為畝
二十五有半因發地得石具識深廣北東西臨溪
南直玉苧峯紀以宋大中祥符之二年視舊加斤

克弘厥規豈神之宿留
告曉於人固如此哉
明洪武三年詔去前代封

爵止稱會稽山之神每歲以春秋二仲月祭後禹

陵一曰

唐之淳南鎮廟詩維昔作巨鎮此地壓荆楊計功自神禹望祀及秦皇馮陵任厚坤

歛吸半炎方昔聞周祀典近者自隋唐器物及儀文制侔侯與王層宮列象設錯落丹青光烟鬣夷霧縠出入人鬼傍嶂聚金碧氣樹多靈鳥翔冥冥象羣怪藹藹圖百祥飄飄紫蓋轟懔懔朱絲張不知誰為助意乃惑愚龐山川固明靈在德非馨香黍祠既靡用古典或可詳騁詞代巫祝自天祈降康

國朝順治八年遣孫廷銓致祭

御祭文

惟神秀競千巖靈鍾萬壑帶江襟海育物福民朕統御
震中敬修祀典昭茲殷薦衛我南藩尚饗

順治十八年遣李敬致祭康熙六年遣王清致祭
二十一年遣李仙根致祭二十四年遣鄭重致祭
二十七年遣阿山致祭三十五年遣裘充佩致祭
三十六年遣溫達致祭四十二年遣王紳致祭

聖祖仁皇帝御書秀巖巖壑四字奉懸廟中復勒石焉

御祭文

惟神德配祝融望隆於越靈威丕赫作鎮南方朕祇承
休命統馭寰區夙夜勤勞殫思上理歷茲四十餘載今
者適屆五旬海宇昇平民生樂業見輿情之愛戴沛下
土之恩膏特遣專官虔申秩祀尚憑靈貺益錫蕃禧佑
我國家共登仁壽神其鑒焉

康熙四十八年遣覺羅滿保致祭五十二年遣拉
都渾致祭五十八年遣薄有德致祭六十一年十

一月

世宗憲皇帝即位遣吳廷揆於雍正元年二月告祭

御祭文

惟神秀挺越山功施浙水威靈有赫作鎮南方朕纘受
丕基新承景命竊念

皇考膺圖以來百靈效順四海從風坐享昇平六十餘載
茲當嗣位之始宜隆祀享之儀特遣專官虔申昭告惟
冀時和歲稔物阜民安淳風遍洽乎寰區厚德長孚於

率土尚其歆格鑒此精誠

雍正十三年九月

今上皇帝即位遣趙之垣於是年十二月告祭

御祭文

惟神秀挺千巖名標百越帶江襟海炳曜炎邦朕纘
承大統仰紹前徽伏念

皇考臨御以來敬禮明神肅將禋祀靈祇孚應昭受鴻庥
清晏奠安茂登上理茲當嗣位之始宜隆望秩之儀

特遣專官虔申告祭惟冀雨暘時若年穀順成萬方
蒙樂利之庥兆姓荷帡幪之德尚其歆格鑒此精誠
虞舜廟 述異記會稽山有虞舜巡狩臺下有望陵
祠弘治紹興府志在郡境者四所一在會稽縣東
南百里一在餘姚縣歷山一在上虞縣西北四十
里一在上虞縣梁湖北

大禹廟 嘉泰會稽志在縣東南少康立祠於陵所
梁時修廟唯欠一梁俄風雨大至湖中得一木取

為梁即梅梁也宋政和四年勅廟額曰告成東廡
祭嗣王啓而越王句踐亦祭別室廟下為放生池
臨池有咸若亭明遠閣懷勤亭弘治紹興府志郡
境尚有四所一在山陰縣西余山一在山陰縣蒙
槌山一在嵊縣了溪上一在新昌縣南名公塘廟
紹興府志山陰廟在塗山南麓宋元以來咸祀於
此明時始即會稽山陵廟致祭茲廟遂廢大禹陵
廟每歲有司以春秋二仲月祭

謝忠連祭禹廟文謹遣左曹掾奉水土之羞前薦
夏帝之靈咨聖繼天載誕英徽克明克哲知章知
微運此宏謨卹彼民憂身勞五岳形瘦九州呱呱
弗顧虔虔是欽物貴尺璧我重寸陰乃錫元圭以
告成功虞數旣改夏德乃隆臨朝總政巡國觀風
淹留稽嶺乃徂行宮恭司皇役敬屬暉融神惠畧
薦乃昭其忠宋之問謁禹廟詩夏王乘四載茲地
發金符峻命終不易報功疇敢踰先驅總昌會後
至伏靈誅玉帛空天下衣冠照海隅旋聞厭黃屋
便道出蒼梧林表祠轉茂山阿井詎枯舟遷龍負
壑田變鳥耘蕪舊物森如在天威肅未殊元芟屈
瑤席玉女侍清都奕奕閨闈邃斬斬仗衛趨氣清
連曙海雲白洗春湖猿嘯有時答禽言常自呼靈
畝異蔗糲至樂匪笙芋茅殿今不襲梅梁古製無
運逢日宗麗業盛答昭蘇伊昔力云盡而今功尚
敷揆才非箭美精享愧生芻郡職昧為理拜空寧

自誣下車霰已積攝事露行濡人隱冀多祐曷難
霑薄軀李紳禹廟詩削平水土窮滄海畚鍤東南
盡會稽山擁翠屏朝玉帛穴通金闕架雲霓秘文
鏤石藏青壁寶檢封雲化紫泥清廟萬年長血食
始知明德與天齊林景熙謁禹廟詩萬國曾朝會
羣山尚鬱盤嚴祠鎮元璧故代守黃冠寔入雲根
濕梁歸雨氣寒年年
送春事來拂蘇碑看

國朝康熙二十八年

聖祖仁皇帝南巡閱視黃河念大禹神功

特幸會稽二月十四日昧爽

詣廟致祭

賜帑金二百兩給其後裔增守祠二人

御書地平天成四字扁額

御製江淮河漢思明德

精一危微見道心對聯一副恭懸正殿紹興府知府
李鐸增葺祠宇五十二年知府俞卿重修而舊祠
規模狹隘歲久漸圯雍正七年欽奉

上諭着加謹修葺總督

臣

李衛欽定察勘動帑興修

伯益廟於越新編在山陰縣承務鄉一名稽山廟

傳撰重稽山廟柱聯稽唐虞二典烈山澤驅蛇龍
佐禹以平水土三江是底故帶礪特存乎兩浙讀
山海一經刊草木燠魚蟲配稷而粒
烝民九土攸同寧俎豆僅盛於八鄉

越王祠 嘉靖山陰縣志 嘉靖十一年知府洪珠即

光相寺基改建以祀越王句踐在府西北二里弘

治紹興府志郡有二所一在府西北一在會稽縣

東南十二里

王十朋越王祠詩寂寂霸圖歇堂堂祠廟留餘休隙一國往事憶千秋苦

戴山中採香醪湖上投平
吳端在此可與後人謀

江東廟 名勝志在城東北二里神石姓諱固秦時

贛人廟食於贛江之東漢陳嬰討南越神以捷聞
此廟越之始

項羽廟 於越新編在項里溪上弘治紹興府志一
在山陰縣西南二十里一在上虞縣西南五十里

朱太守廟 名勝志在文應橋西即朱買臣有破甌

越功人民德之

張世昌朱太守廟詩會稽太守吳門客昔年負薪人不識衮龍天近

日易明金馬門深露猶滴漢家天子登夔龍百年禮樂唐虞風金印歸來大於斗錦衣直照天南東

丈夫英雄誓許同生當封侯死廟食烏啼老屋起秋風淚痕濕透羊公石

梅福廟 名勝志在梅里尖之麓今即梅山寺立像

祀之紹興府志明知府張明道立

張喬梅福廟詩梅真從羽化萬

古是須臾此地名空在西山雲亦孤井痕平野水壇級上春蕪縱有雙飛鷺多年松已枯

鄭太尉廟 弘治紹興府志在會稽縣東南十五里

之樵風涇祀漢鄭弘

華鎮鄭太尉廟詩并序鄭相起樵風用郡守第五倫之薦

致位三公與倫並列可謂盛矣祠宇之下至今猶有風朝南暮北鳴玉銜金漢上公當年榮與舊君

同故山廟食千秋後來往猶乘旦暮風

馬太守廟 紹興府志一在鑑湖東跨湖橋南祀東

漢郡守馬臻以臻開鏡湖築塘蓄水遺利甚溥民

立祠以祀山陰縣志一在縣西六十里廣陵陡門

上

王十朋馬太守廟詩會稽疏鑿自東都太守功從禹後無能使越人懷舊德至今廟食賀家湖

徐天祐馬太守廟詩澄湖昔在鏡中行總是當年畚鍤成莫訝靈祠荒蕪合烟波萬頃已春耕

國朝康熙五十八年知府俞卿重修

徵愛祠 紹興府志在臥龍山東麓明嘉靖三十一

年知府梅守德即大節祠改朔祀漢太守劉寵宋

太守范仲淹久之祠圯乃移二像入明知府王昇

期祠內

國朝康熙十一年知府張三異撤而新之易額曰義愛
後又增入明知府許如蘭并

國朝知府張三異合宋義士唐珏並祀於右楹康熙五
十四年知府俞卿重修

曹娥廟 於越新編初屬上虞後改隸會稽在府城
東九十二里宋大觀年封靈孝夫人政和年加封
昭順淳祐年復加封純懿且封其父為和應侯母

為慶善夫人又熙寧中會稽令董楷以朱娥配享
明因之不改嘉靖間知府南大吉廓之以合郡烈
女從祀兩廡萬厯四十五年送諸娥入祀配享號

三美祠

傳詳列女藩閭曹娥廟詩曹娥廟前秋草
平曹娥廟裏秋月明扁舟一夜炯無寐近

聽江聲似哭聲王十朋曹娥廟詩慟哭無尋處投
江竟得屍風高列女傳名重外孫碑荒草沒孤塚
洪濤吞古祠懷沙為誰死翻愧是男兒錢惟岳曹
娥廟詩曹娥廟貌樹豐碑千古行人痛色絲苦恨
當年題八字不
旌賢孝只旌辭

國朝順治五年里紳沈文奎捐金重建

關帝廟 會稽縣志在西府坊白馬山下紹興府志

又有廟在龍口鎮東閣側

國朝康熙五十五年知府俞卿修

按境內廟所在多有惟山陰之大雲橋及

西郭之至大寺靈爽尤著

王右軍祠 萬歷紹興府志在蕺山戒珠寺東寺即

右軍別業嘉靖十年知府洪珠移置於佛殿之西

寺門外鵝池墨池尚在

吳萊謁王右軍祠詩小立天地窄前登萬山阻越王

採蕺處秋綠空榛蕪古祠復何人遺像寄梵宇柳老題扇橋荷香弄鵝浦典午當衰亂神州渺淮楚

經畧欲馳兵保障期安堵奸溫多大志誕浩却浪
許護軍曾參綜歲疏極心膂廟謀不可勝野戰徒
爭武內外未協和英雄偏豪舉泗口聊進屯譙城
遽奔沮事勢日趨異朝廷就撐拄去官寧忤違誓
墓獨酸苦父子但法書功勲總塵土青緗每收拾
絲筆餘圖譜草隸俱入妙雲龍競掀舞崔蔡須抗
行羊殷豈儔伍鳬鷺或有識野鷺紛難數平生
破布被謾以指畫肚起叩放墨池長鯢戰風雨

國朝康熙五十七年知府俞卿修

賀監祠 會稽縣志在鏡湖上唐秘監賀知章祠也

諸葛興賀監祠頌山簇簇兮環湖水森森兮縈紆
人何遊兮明鏡鳥何飛兮盡圖懷賀老兮今昔想
逸致兮林廬老之襟兮天濶老之神兮秋月飛翰
兮龍鶯吐詞兮冰雪際熙運兮開元司緝典兮春

官凌玉簫兮倚華蓋驂鶴馭兮升西崑俄清夢兮
綿綿恍乘雲兮登仙覲紫皇兮玉宸聆九奏兮鈞
天戩天公兮遂志鼓予枹兮錦里吾朋兮鷗鷺吾
賓兮烟水野服兮踰躔斑衣兮娛戲緬高賢兮非
苟於去就庶幾兮東門之傳鷗夷之子王十朋賀
監祠詩賀老祠堂枕鑑湖霓裳羽化宅荒蕪無人
更問君王覓轉
使高風千載孤

錢王祠 嘉靖浙江通志在縣南五里祀吳越王鏐

皮光業撰廟碑

見藝文志徐天祐錢王廟詩石檻
山前結駟遊故鄉霞錦徧林邱祇

今東府空遺廟露
立唐碑老樹秋

高氏五王祠 山陰縣志在府城西六十里祀宋太

尉高瓊封衛王子繼勳封康王孫遵甫封武功
郡王進楚王曾孫士俊封武寧郡公追封武寧郡
王元孫公紀封晉寧郡公追封晉寧郡王靖康末
少保高世則扈蹕南渡領越州觀察有功於越奉
勅建祠

司馬溫公祠 弘治紹興府志在山陰縣北三里公
四世孫吏部侍郎開國伯偁扈高宗南渡遂家於
山陰立祠奉祀歲久頽廢明景泰間偁九世孫廷

芳奏行有司重修

國朝康熙五十四年知府俞卿修

尹和靖先生祠 萬歷紹興府志在捨子橋下古小學內嘉靖間知府洪珠改建有司春秋祭

劉公祠 紹興府志在杏花寺側知縣唐時舉建以祠五忠劉公者按宋史劉頴諡忠簡孫純諡忠烈從孫韜諡忠顯韜子子羽諡忠定子羽子珙諡忠肅當方寇之亂韜守會稽有捍禦功舊有祠而祀

其後裔有為山陰幕者因家於越乃合五忠祠祀之有司春秋祭

愍孝祠 嘉泰會稽志在府東北孝子蔡定父以事逮獄年七十當贖吏持不可定祈哀太守願以身代不報因趨府橋下自湛而死太守翟汝文聞之亟命出其父且給輶以葬定後七年太守王綯始

克請於朝賜廟額曰愍孝

王十朋蔡孝子詩我昔嘗讀黃絹碑長嘆越國

無男兒孰知種山山下水千載有此一段奇鳴呼哀哉蔡孝子風烈遠過羈與恢乃翁白首困縲絏

半年不脫兒心悲請身荷械代父罪或甘黥涅居
軍麾況遇軍興擊卒叛身先矢石死不辭當時非
無賢太守孝子抱志終不施人間無路可赴愬投
命河泊祈天知自為銘誌及訟牒欲訴以魂贖以
屍情哀意切語不怨孝與忠厚俱天資臨河更效
結纓死顛沛於禮曾無虧父脫纍囚子願畢身在
九泉甘若飴名聞九重獲旌表兩楹破屋河之湄
未聞設謀有度尚絕好更欠邯鄲詞我來贊幕欽
孝烈顧瞻廟貌成吁嘻他年太
史作佳傳願從紙尾書吾詩

旌忠廟 於越新編在府東南五里宋太守傅崧卿

建祀衛士唐琦

傳詳忠臣

萬厯會稽縣志後帥陳汝錫

再請詔賜額曰旌忠隆興間帥吳芾增修之元至

正十六年推官貢師泰重修明天順七年知府彭

誼重修

戴冠旌忠祠詩唐琦一衛士初不聞聲名思欲報主讐奮然竟捐生殺身雖易言幾

人能果行琦志不可奪口與心自盟事在義與否何計敗與成金石或可革此心無變更死願為厲鬼生願為干城厲鬼殺逆賊干城捍寇兵取我舍主義愧彼偷生榮中有一腔血誓為吾君傾安知死廟食但求生結纓

史魏公祠

萬厯紹興府志在戒珠寺前宋史浩守

越奏免湖田糧民為祠額曰彰德

吳孜祠

紹興府志在府學內宋吳孜捨宅為學因

祀之

王十朋吳孜祠詩右軍宅化空王寺秘監家為羽士宮惟有先生舊池館春風長在杏壇

中

朱文公祠

紹興府志在府西南一里初嵇山書院

有公像明萬厯七年書院廢十年知府蕭良幹復之遂易額有司春秋祭

徐相公廟

萬厯紹興府志在會稽縣學西

徐渭徐相公廟

碑神姓徐名龍佛世鳳陽人宋端平三年生當父官會稽學時嘗從道士拾鷄卵腋之得白鷄以鬪莫有敵者父母憎其俠遂去家為縣獄長未幾改行讀書歸事其父母以孝聞歿而為神至動人主

咸淳三年詔封神白衣
頂聖入明人爭奉之

雙義祠

於越新編舊在名宦祠側歲久圯明嘉靖

間知縣張鑑改建於攢宮

文徵明雙義祠記嘉靖二十六年丁未十月會

稽雙義祠成祀宋義士唐公珏林公德賜也宋社既屋宋諸陵之在會稽者悉發而平之奸僧楊璉真伽實倡率焉珠玉悉攫取而投骨榛莽極其懣憾二公先後以他骨竄易而瘞之植冬青以志願正史不傳雜出於紀事之書其言不皆同而皆有所徵要為不誣也縣故有祠在名宦祠之左歲久且敝南充張君鑑以甲辰進士來知縣事謂二公所為得名直以陵寢之故陵旁故多隙地依陵植祠於事為宜歲時有事六陵以次及公祠與陵相為終始亦庶幾二公之志也

顯應廟 萬歷紹興府志在攢宮

季本顯應廟記郭公諱紹以行稱紹

一生於元至元六年性質直有義氣鄉閭有急每以身先之不求其報家貧以樵為生毫髮不苟取人言禍福歷歷皆有明徵鄉人異之故水旱疾疫必致禱焉

劉太守祠 萬歷紹興府志在府城隍廟西正德三

年郡人王埜輩建祀知府劉麟

王文成公祠 紹興府志在府北二里許明嘉靖十

六年御史周汝員建以祀王陽明守仁

薛應旂告陽明祠文

嘉靖壬子春二月後學武進薛應旂視學紹興謁
陽明王先生祠見祠以新建伯題額因思先生之
所以振起乎俗學著存乎人心者恐不專在是也
屬紹興府知府梅守德易以今額具香帛果醴為
文以告之曰於乎先生豪傑之才聖賢之學闢世
路之榛蕪闢吾道之精一真有繼往開來之德不
止勤事捍患之功旂等雖未及門竊幸私淑頃登
先生之祠會先生及門之士議易今額直書曰陽
明先生
祠謹告

國朝康熙二十九年知府李鐸重修易今額

忠節祠 萬歷紹興府志在府城西南五里正德時
裕州同知郁采死流賊之難嘉靖中僉事蔣舜民

知縣劉曷即其墓立祠祀之

忠烈祠 紹興府志在徵愛祠之左明嘉靖二十一年知府沈啓勅祀餘姚孫忠烈燧兼祀其子都督堪尚寶卿墀南京禮部尚書陞

褒忠祠 山陰縣志在光相坊新建伯祠之右明嘉靖三十四年紹興府知事何常明山陰庠生金應暘餘姚監生謝志望庠生胡夢雷禦倭死於難事間於朝常明贈太僕寺丞應暘志望夢雷俱贈州

同知立祠以祀之

沈公祠 萬厯紹興府志在嵇山里隆慶六年巡按御史謝廷傑建祀贈光祿寺少卿沈鍊有司春秋

祭徐渭有記

傳詳忠臣

龐公祠 紹興府志在府學西明萬厯間郡人建祀
巡按御史龐尚鵬

景賢祠 萬厯紹興府志在禹跡寺西萬厯二年建
祀長沙知府季本張元忬有記

傳詳儒林

湯太守祠 紹興府志在開元寺內祀知府湯紹恩

傳詳名宦明萬厯初建其生祠在三江閘口明嘉靖中

建

國朝雍正三年六月浙江巡撫法海以紹恩創築三江

閘有功紹郡題請封號

勅封寧江伯春秋致祭

六賢祠 在郡城南府學之東羅門側

國朝康熙二十四年知府胡以渙建祀明季節義諸臣

監察御史黃尊素戶部尚書倪元璐左都御史劉宗周左副都御史施邦曜右庶子周鳳翔蘇松巡撫祁彪佳

陸孝子祠 在丈五村

國朝康熙五十五年知府俞卿建祀孝子陸尚質

傳詳孝友

張文恭祠 舊浙江通志在山陰縣右明萬厯間建

祀諭德張元忬

傳詳儒林

陶文簡祠 紹興府志在江橋右明天啓間建祀祭

酒陶望齡

傳詳儒林

雙節祠 萬厯會稽縣志在賀家湖口江家園止水

墩明弘治中里人建以祀范氏二女嘉靖間知縣

牛斗重新之

傳詳列女湯紹恩雙節祠詩老夫和淚寫新詩止水亭中雙節奇萬古網

常同一死寸心鐵石兩無移驚分鏡影秋風冷月咽簫聲夜月遲天地不窮情不盡迄今草木有餘悲

忠義節孝祠 山陰縣二祠俱在上植坊會稽縣二

祠俱在朝東坊

國朝雍正四年知縣周崇高張我觀奉文建

蕭山縣

先農壇 在縣治東門外

國朝雍正五年知縣門鈺奉文建立壇宇并置耜田四

畝九分

社稷壇 萬厯紹興府志在縣西二里

風雲雷雨山川壇 紹興府志在縣東三里

邑厲壇 萬厯紹興府志在縣北一里

城隍廟 弘治紹興府志在縣治南一百五十步其神舊志稱崇福侯蓋誤以府城隍舊額冠之也

寧濟廟 紹興府志在西興鎮浙江潮神也宋政和三年賜今額六年高麗入貢而潮不應有司請禱潮即大至詔封順應侯淳熙末高宗靈駕來太守張杓躬視漲沙沿御舟入浦處盡護以紅竹詰朝方集萬夫迨潮落沙已蕩盡水去所插之竹纔尺許及虞祭畢沙復漲塞先是已加武濟公於是又

加忠應翊順靈祐公慶元四年賜爵孚祐王有司
以八月十五日祭

白龍王廟 紹興府志在航塢山宋紹興中建

武佑廟 嘉泰會稽志在縣北二里舊號北嶺將軍

廟蕭山縣志又名厲將軍廟

輟耕錄至正丙申歲大旱方士陳希微禱

雨於武佑廟累日俄降筆云吾秦人厲狄也與項羽起山陰雖功不竟而死然有德於民其父老不忘我者俾血食於此世代雲變湮我姓名故以相告至今人呼為厲將軍廟劉基北嶺將軍廟碑餘暨東北百里為蕭山縣其山曰北幹之山其神甚靈能祛疫癘作雲雨人有所祈必應尊其神曰北

嶺將軍歲時祠焉宋徽宗時方臘反睦州自睦入杭具舟將渡江吏民大恐怖相率禱於神比寇至即有風逆其舟且見甲士列岸上甚衆乃止不敢渡寇平知越州劉韜上其事於朝賜額曰武佑廟後封顯應侯有元至正十二年主簿趙君誠至縣元統甲戌春以俸錢作新廟予為之歌俾祀神焉

劉太守祠 蕭山縣志在錢清鎮北祀漢會稽太守

劉寵

傳詳名宦

唐封靈應侯宋改靈助侯元至正間帥

周紹祖重建明嘉靖三十六年令魏堂葺

王叔能劉太守

祠詩劉寵清名舉世傳至今遺廟在江邊近來仕路多能者也學先生揀大錢沈環劉太守祠詩古廟小江邊穹碑記一錢清名垂竹帛遺愛豈蒲鞭犬臥花村月人耕綠野烟千秋承血食誰復繼前

賢

國朝康熙二十八年知府李鐸屬會稽縣知縣王風采
修之五十五年知府俞卿重修

張靜安公廟 紹興府志在縣東北十里之長山神
諱夏宋景祐中浙江塘壞神時為工部郎中受命
護堤置捍江五指揮各率兵士四百人採石修塘
隨損隨築人賴以安郡人為之立祠朝廷嘉其功
封寧江侯俗謂之長山廟

國朝雍正三年

勅封靜安公春秋致祭

德惠祠

蕭山縣志在湘湖明成化元年賜額祀宋

邑令楊時後以邑人吏部尚書魏驥同祀

劉鈺德惠祠記

宋大儒龜山楊文靖公政和間為蕭山令多惠政而其大者水利焉蓋民嘗苦旱公相邑西南多山地勢高亢平曠乃築堤延袤八十餘里瀦水曰湘湖利及九鄉民感其惠立祠湖上曰楊長官祠又加圖其像祀之歲久祠廢景泰初南京吏部尚書南齋先生家居謀諸縣令得湖東百步許廢寺山麓以復其祠劉珣魏文靖公配享德惠祠記景泰改元邑人魏文靖公致仕歸里視楊公堤舊規隳

廢年久設法築塘高廣內增築臥羊坡抵避湖中風浪栽柳於塘使其堅久革除占湖為田七千三百一十八畝及江海無塘障衛民罹水旱勸率官民修築復舊塘閘堰壩一十二處薨後遺言辭免營葬省銀一千七百餘兩轉濟饑民槩縣之民感公之惠合章上請立祠報祀下廷臣議曰公初由文學歷官中外歸休林下恒以邑環江海多水患為憂以楊龜山湖提遺跡閘堰塘壩倡率修築著水利切要以發明之德惠昭昭宜從所請列於楊時之右合祠祀之章上報可

楊公祠 於越新編在縣東二十里長山尾祀明守

道楊一葵

錢象坤楊公祠記憲副楊公蒞越以歲甲寅築石塘橫袤九十五丈又用錢氏

法實石於竹籠倚疊為岸固以椿木袤一千三百一十丈復以餘力濬河千一百餘丈費金三千七

百有奇越之水利東則湯公開西則蕭公堰而今則楊公塘可列為三公福之漳浦人壬辰進士

施侯祠 紹興府志在倉橋祀明知縣施堯臣

傳詳名宦

忠義節孝祠 忠義祠在縣治學宮之東節孝祠在

縣治西門外

國朝雍正四年知縣門鈺奉文建

諸暨縣

先農壇 在城東金雞山下

國朝雍正五年知縣黃道中奉文建立壇宇并置耜田

四畝九分

社稷壇 萬厯紹興府志在縣北三里

風雲雷雨山川壇 弘治紹興府志在縣南四里

邑厲壇 紹興府志在縣北二里

城隍廟 諸暨縣志在縣城西一里宋淳祐壬寅縣

令家坤翁遷於淨觀院南明洪武三年主簿史子

疇重建長山之陽傾圮永樂間邑人曹希賢王景

明等建萬厯己亥縣尹劉光復開闢直道前臨湖

水

俞柳仙判官廟

嘉泰會稽志在縣東南孝義鄉父

老傳有姓俞者久寓村媼家病革語媼曰死以兩大甕合以葬我扛折則寔鄉人如其說復夢俞曰今為天曹雨雪部判官會野火且至烈日中雨雪塚上遠近異之即其地立祠紹興初久旱迎神至大雄寺禱雨立應歲以大稔相傳神喜柳枝邑人致禱必持柳枝以獻因號柳仙云

陶朱公祠 嘉泰會稽志在縣東南五里祀越相范

蠡

興越二大夫祠 諸暨縣志在上橫街祀范蠡文種

明萬歷庚子耆民鄺有政請邑侯劉光復創建

劉光

復興越二大夫祠記越之冠帶而長中諸侯者自王勾踐始其噓燼復燃脫累然冢君沼強兵而威上國實惟范少伯蠡文子禽種是係厥勞偉矣厥施勤矣二大夫義當祠然後世多震慕少伯高蹈而悲文之不早見遂霄壤之嗟乎此未易言也少伯智周天人機決時宜當逆戰夫差時強諫弗聽已習知主之不同量獨以毀軍滅名復隱忍以見志功成身退得天道也若子禽朝格敵而夕行成

國虛無人挺任居守身家已置之若棄一心惟雪恥報國是圖迨泣血枕戈倖剪寇仇而通周室方將借天子靈寵以屬諸姬桓文寡君而駕軼管范諸人為愉快豈意君之遽我猜乎然即其從容自我裁曰臣聞命矣無纖毫怨懟狀則非如悻悻矜功伐而懷憤懣者比也所謂生死不二之臣非歟且少伯告君曰親附百姓臣不如種是二大夫自為有明聞而其造澤於越則一也則為此地而議崇祀誠無先二大夫者故題其額曰興越二大夫祠著越之文明光大自二大夫始也

孟子廟 諸暨縣志在縣西三十里夫槩鄉係四十

七世孫信安郡王孟忠厚扈駕南渡幼子環衛上將軍開國男孟載封爵諸暨因家焉嘉定丁丑建

明萬厯間知縣陳正誼重修

陶允宜孟子廟碑記
宋南巡有扈從渡江

曰孟載者孟子四十七代孫信安郡王忠厚子封爵諸暨縣流寓夫既鄉子孫家焉嘉定丁丑建孟子廟肖像其中四時專祀其後廟宇日頽嘉靖間郡守張侯計直修葺俄以兵火寢工萬厯間陳侯出宰茲土聞邑西有廟釋奠既畢徘徊四顧遂謀新之命孟氏之族長文獻合其族人醵金若干鳩工庀材以告始事侯復捐俸百金以竣厥役仍請於督學喬公大叅胡公檄其後充生員以奉廟事於是夫槩之墟炳然三遷之里矣

國朝順治間六十四世孫稱舜生員樹忠等呈請撥田

六頃供奉祭祀

朱太守賈臣祠

諸暨縣志在縣北之松山宋嘉熙

四年勅賜文應廟每歲祈年社會最盛

趙希鶚朱太守賈臣

碑記諸暨為邑左山右澤地勢高下殊絕故旱澇輒暴至嘉熙庚子秋七月積陰不開霖雨大注霹靂震霆巨電交作民大駭邑令祈於四塘弗應鄉耆老祈於社里弗應於是川流驟漲四野瀰漫如澤谷壞室廬損苗稼老雅感額適提點刑獄使者項公容孫行部至縣召父老曰古者能禦大災能捍大患必有山川英靈之氣鍾為明神而邑之神寧無是者乎僉曰吾邑松山朱太守之神生而父母吾邦歿而血食鄉井盍禱焉翌日吏率其僚佐民會其保伍走祠下瓣香致敬拜伏未興濃雲忽收霽色如鏡洪波既息禾則盡起吏民大喜相與議曰何以報神賜遂以事上府府大師蔡公範聞

於朝天子下太常寺議廟貌嘉熙四年九月三日
勅賜文應廟秩於祀典命下之日閭里騶呼因鳩
材以葺祠宇闢重門揭廟額仍刻石登載始末按
班固漢史侯姓朱諱買臣會稽郡人或以為諸暨
卽其所居邑由布衣以策干漢武帝帝伐南越侯
以丞相長史出為會稽守守故鄉故於是邑宜有
祠祠居山之巔今徙於麓紹興間左朝散大夫郭
公亢新其棟宇驗梁木舊題乃東漢陽嘉三年所
建者舊傳唐末黃巢之變賊入縣境有見來旗書
松山神號者因遁去宋朝宣和甲辰妖人方臘嘯
聚欲入境神見一嫗織巨屨賊怪問之嫗曰將以
供官軍賊遽退慶元戊午延寇跳梁尉楊思中禱
之得吉卜整衆擒賊賊望見神旗如翼時驚駭乃
潰凡邑之旱蝗水災及癘疫無禱不應於文學科
舉之士占得失尤驗今禮官以文應定廟額蓋取
史臣語內外以文相應之義廟成爰作迎享送神

之歌淳祐甲辰
二月初吉記

史大夫祠 諸暨縣志在縣西北三十里靈泉鄉按
大夫家世其先杜陵人諱昭德輝其字唐咸通中
充諸暨鎮遏使平喬中甫之亂黃巢犯境又却之
卒葬靈泉鄉之溫泉村邦人懷之立祠祀焉

梁公祠 於越新編在紫山明隆慶間建祀知縣梁

子琦

傳詳
名臣

忠義節孝祠 忠義祠在學宮內泮池西節孝祠在

江東下坊門地方

國朝雍正四年知縣佟逢年奉文建

餘姚縣

先農壇 在東郊

國朝雍正六年知縣葉瑄文奉文建立壇宇并置耜田

四畝九分

社稷壇 萬厯紹興府志在西門外一百五十步

風雲雷雨山川壇 弘治紹興府志在縣南門外

邑厲壇

餘姚縣志在治北武勝門外燭溪鄉

城隍廟

餘姚縣志在治東二十步元至正二十五

年重建

汪文璟重修城隍廟記城隍廟在州東北二十步故老相傳宋淳熙間封崇德王我

朝至正二十二年加封崇德昭應王越三年九月命下而知州王侯瑤來蒞是州者二年矣政簡而役均民安而吏肅水旱疾疫有祈於神無不輒應侯於是樂民之和感神之德而侈上之賜也乃捐俸以率其僚屬父老大修厥廟易其朽蠹破壞而增其未備者於是門廡殿寢內外一新廟修於至正二十五年四月十有日明正德七年令張瓚新之五日成於十二月一日

嚴時泰城隍廟膳田記正德間城隍故祠以歲久就頽邑宰張侯瓚謀新之衆舉吳山寺僧文顯至

則首出衣盂長物以倡施者響應不踰年落成復置常稔田三十餘畝請給符牒以禁將來之鬻并邑令顧侯存仁給之復稽舊籍而免其丁役焉嘉靖十九年通判葉金於縣之東南隅建齋房五楹萬歷十五年知縣周子文改建廟後設東西廡其後知縣黃琰重修

國朝順治三年同知王應升復新之

東嶽廟 萬歷紹興府志在大黃山宋政和四年通直郎顧復幾捨址知縣廖天覺建建炎間燬市舶使史應炎捨今址復建嶽廟在郡中各邑往往有

之而餘姚獨盛

緒山廟餘姚縣志舊在龍泉山後廢遂移建於西

門月城內

李泳緒山廟記餘姚縣緒山祠祀典始於東晉咸康暨本朝崇寧間徽廟一夕

夢禁中火有神人撲滅已而致恭曰臣越之餘姚緒山神也黎明有司不謹歟及內庭得暴雨乃已上驚異有旨下本道搜求靈跡宛然邑上其事勅加咸康應夢之號宣和方臘之叛二浙搖動綠林數十起剡中將及境人情恟恟有異雲蔽道若不可進衆睨雲中鬼神兵熾可駭皆禡魄遁去乾道三年玉牒趙彥仁緯與邑耆艾有事祠下視棟宇歲久而像設湮闇風雨烏鼠之所穿漏相顧太息裒貲為倡俾和者成之凡錢貲工財之委應期皆至裒於春成於夏功不勞而廟貌一新

國朝康熙九年復徙龍泉山舊址

南雷瑞應王廟

嘉泰會稽志在縣南雙鴈鄉舊廟

大小雷山因溪水泛溢流木至此遷於今所

修元

南雷瑞應王廟記至正六年夏五月不雨土田曠
乾農夫告病餘姚守汪侯辰良與官屬議於庭曰
吾守茲土時值歲旱民用愁苦其咎在吏我不可
不為民請按州志四民之山有北麓於州為南山
其山曰大雷小雷其神曰南雷之神起晉咸康間
得祠祀南有大樹幾百圍空中可容數十人下窪
為泉冷然居人或見異蛇緣上天必雨謂為龍云
凡民有灾沴妖孽旱蝗水滂之菑禱之無不應宋
宣和間羣盜方臘寇縣縣民號於神賊且至毒蜂
被野賊懼而遁神數為民禦災捍患連著顯責宋

嘉定初勅賜廟額曰孚應實為人祠遂於丁亥率官屬畢出請禱還及州而雨終日民猶以為未足而申守又往禱屏車却蓋自稱無狀是日天無雲赤日赫然頃之雷雨作雨三日而後止甌窶汚邪皆生美禾是歲為有年民乃曰祠撓弗葺何以報神我將修樹祠廟刻石於門以昭神功且以彰守之仁衆皆曰然訖成屬余記之

漢高帝廟 萬厯紹興府志在白山山形類蛇又產白蛇故祀以厭之

嚴子陵祠 弘治紹興府志在縣東北十里之陳山光之宅墓皆在焉其廟乃宋乾道中郡守史浩所

建於越新編嘉靖間知縣丘養浩徙千佛閣左春

秋祭

孫應時嚴先生廟記先生吾餘姚人也晚耕於富春山富春析而為桐廬釣臺屬焉自文

正范公建祠而記之釣臺之名大顯而吾邑之地靈人傑世反不傳非闕歟土俗所記吾邑稍東江瀨粼粼上下常有聲是為子陵灘蓋其初之釣游處也旁又有山曰嚴公山山有古祠曰先生廟

謝太傅廟 紹興府志在東山祀晉謝安

永澤廟 餘姚縣志在儒學旁元州判官葉恒築海

堤民思其功請於朝廟祀之後祀於開元鄉龍王

堂

石孝子廟 餘姚縣志在四明鄉祀石明三元重紀

至元中建

傳詳孝友

趙考古祠 於越新編在新城內明嘉靖中知府湯

紹恩建祀教諭趙謙

傳詳儒林

毛忠襄祠 萬厯紹興府志在汪姥橋東五十步祀

忠襄公毛吉有司春秋祭

倪宗正毛忠襄祠堂碑記公字宗吉自幼負氣

節陞廣東按察司僉事廣西蠻賊滋蔓揮刀斫賊力屈被害七日得屍貌如生官吏士民弔哭相屬時從車餘攜軍銀或密付公家僮為歸資是日公降於僮妻悉索以歸夏憲長曰吾平生玉潔肯舍

垢入地哉闔署駭觀事聞贈嘉議大夫本司按察使廣東人被公之德者祠之水旱疾疫禱之輒應咸神之况茲鄉公之所生其山川公英靈所由萃也人之神之也宜哉

謝文正祠 紹興府志在龍泉山忠烈祠東明大學

士謝遷祠也有司春秋祭之

傳詳名臣

海日祠 萬歷紹興府志在新建祠東祀文成公父

尚書王華

傳詳名臣

忠烈祠 嘉靖浙江通志在龍泉山南麓祀贈禮部

尚書孫燧嘉靖二年知縣邱養浩建

黃芳忠烈孫公祠堂碑正

德己卯六月宸濠反都御史孫公死之卽死所建祠曰旌忠知縣邱養浩請於當道曰夫名德祀於其鄉自古為訓餘姚公生其地而祠闕焉甚無以妥幽靈答明貺乃即龍泉山巔祠之額曰忠烈公諱燧字德成別號一川居士祠地縱橫若干門室各三楹東西廡各五楹皆養浩請公帑鳩工市材之成

陽明先生祠 嘉靖浙江通志在龍泉山舊為上方僧舍先生嘗講學於此嘉靖十四年提學徐階因為建祠先生手書學規今猶在壁間祠左有海日樓

黃忠端祠 餘姚縣志在新城保慶王廟左祀黃忠

端公尊素有司春秋祭

張鵬翻黃忠端祠堂碑銘
澠滸姚江理學是衍德業

文章聿推新建繼此者誰黃公莫先公生不辰貂
璫逞亂素尚寶椒一日百戰巖巖黃公犯顏直諫
并戒同列旁燭隱患哀哉貞士或殛或竄鸛鵲爭
鳴卒及於難廟祀歷年俎豆於粲滛潦稽天助虐
閹宦遷而新之桷栢輪
與傳之永久精神靡散

國朝雍正九年總督臣李衛檄縣重修

施恭愍祠 餘姚縣志在驛東祀明末殉節左副都

御史施邦曜有司春秋祭

國朝順治十年賜官地七十畝以為祭田

貞烈祠 於越新編在新城內石鬼橋西祀姜通判

婁賓氏

傳詳烈女

忠義節孝祠 忠義祠在儒學左側節孝祠在奉裁

姚江驛基

國朝雍正五年知縣葉瑄文奉文建

上虞縣

先農壇 在縣東郊外

國朝雍正五年知縣許蓋臣奉文建立壇宇并置耜田

四畝九分

社稷壇 萬厯紹興府志在縣西一里

風雲雷雨山川壇 弘治紹興府志在縣西南二里

邑厲壇 萬厯上虞縣志在北門外一里

城隍廟 紹興府志在縣東一百步萬厯上虞縣志

初自後漢其址係史壽總所捨宋寶祐中莊演等
再初東有廳事元陳椿應順等改為觀音堂後鍾

愷王福相繼修治而壽總後裔得仁又益地重建

陳文鼎應筠葉文珪以次興舉萬厯十二年令朱

維藩重修二十五年令胡思伸改修

胡思伸城隍廟記虞有城

隍廟初於漢廢於唐復於宋遞廢遞興未詳所自今廟在邑之東與治署隣若曰邑主者既以嚮明而治神則司其柄於冥漠中儼然而通盼蠻馬凡祐善罰淫報不爽銖寸先是嘉靖甲寅間島倭為釁三犯我郭而無能加一矢保障之功偉哉歲久患地又湫隘不稱瞻仰余萬厯丙申蒞治拓地聚材葺而新之

石窟廟 萬厯上虞縣志在羅巖山麓奉桑神神嘗

助宋兵有功封郡王明張秋河決嘗顯陰靈助築
至今客江湖者遇險難呼號求救輒獲護持有祈
禱其應若響

握登聖母廟 嘉泰會稽志在縣西南四十里握登

山之巔舊傳舜母名握登生舜於姚墟因姓姚氏

蕭將軍廟 嘉泰會稽志在縣東南十四里將軍秦

人諱闔與弟閼領兵東之上虞植金鞭於地而自
誓曰化為黃竹吾當血食於此已而黃竹生焉黃

竹嶺由此得名嶺去廟甚近廟有斷碑云吳太元二年縣令濮陽興立

遺德廟 萬厯紹興府志一在五夫鎮一在法界神周氏諱鵬舉東晉時宰上虞後守雁門曾游漁浦湖全家沒於水自是數示靈響民立祠奉之號仙官廟唐天寶間鄉人孔澤趙瑗請禱願遷忽大風四起朱紱及香爐皆隨風而去二人視其爐紱所止處聞之於官為建祠堂賜額利濟祠中藏錢王

所賜紫袍犀帶及鐵鞭之屬

宋宣和七年敕浙部使者秦上虞遺德廟

當睦寇猖狂引兵壓境忽素旗出於廟中賊衆駭愕謂官軍已至遂退走赫然明靈實相天討保完一方命賜爵為威惠侯以顯神之威德俾民報祀世其無怠

嵩城大王廟

萬厯紹興府志在縣西北六十里晉

隆安中海寇亂袁山松築城禦寇而死鄉人祀之

崔長官廟

萬厯紹興府志在縣西七里祀唐縣令

崔協

林仰成崔公祠記公為邑令適歲旱征輸莫辦乃捐俸代輸至罄其家積邑人深德之置

祠於莫氏地號莫家祠祠前有樟九株名九株樟後宇廢木茂里人擬古甘棠昇香火於樹下奉如

祠後嘉靖己亥復營構迄今又越二十餘禩矣樟
盡萎而廟貌僅存擇日量工門庭楹廡悉更經營
祠宇既備復買置
祭田以供祀事

朱娥廟 紹興府志在縣南八里娥既配曹娥廟其

後上虞邑人復為立祠

傳詳烈女葛焜朱娥詩孝女祠堂溪水邊蕭蕭古樹

近龍烟遺碑別蘇臨風
讀不待中郎事亦傳

鄭公祠 於越新編在等慈寺東祀明知縣鄭芸

傳詳

名宦

忠義節孝祠 忠義祠在縣學內東首即孝祠在縣

學外金罍坊八字橋側

國朝雍正五年知縣許蓋臣奉文建

嵯縣

先農壇 在東效朱公河岸側

國朝雍正五年知縣張泌奉文建立壇宇并置藉田四

畝九分

社稷壇 萬厯紹興府志在繼錦門外西嶺之上

風雲雷雨山川壇 弘治紹興府志在縣方山鄉

邑厲壇 嵯縣志在縣北二里仁德鄉二都

城隍廟 嘉泰會稽志在縣西五十步嵯縣志創不

知何始元至正六年尹冷瓚修二十四年燬守帥

周紹祖同攝尹事邢雄建明洪武三十年知縣江

瀾新之成化中知縣劉清重建弘治十一年知縣

徐恂增葺萬曆四年知縣譚禮建儀門及東西廂

宇十五年知縣萬民紀撤故址鼎建

國朝康熙八年知縣張逢歡重建

始寧城隍廟 嵯縣志在三界即古始寧治廢廟存

居民即以祀社

吳鉉始寧城隍廟記廟去縣北六十里三界里人之鎮神也創於東

漢永建元年為始寧縣治東晉咸和間中原人物遷隱於始寧者甚多隋之開皇併於會稽唐貞元二十一年洪水衝決大壞民居今之大江即古之官巷也由是縣治廢而神祀尚存自漢晉唐宋元明歷千餘年如一日至於今不城郭而山溪自勝也不壇壝而蜡臘相承也不辟雍而多士之禮樂彬彬也不木鐸而比屋之相親相遜猶然太古遺風也德政名鄉太欽名里民安物阜居然巨鎮一十三社春秋報靡敢不恭水旱疾疫禱無不應其卵翼吾人如慈母居舊壤而食舊德歌思弗諼永為始寧遺跡云

白雲祠

於越新編在縣東六十里祀昇仙太子晉

阮肇廟

弘治紹興府志在嵯縣南十里肇之故居

張胄阮廟詩春溪溶溶春水滿兩岸桃花連不斷
遙看彷彿武陵源曉色晴曛洞霞煖花深樹密別
有村青山負絕無塵氛參差樵舍依林住窈窕漁
家傍水濱當年劉阮曾居此採藥天台遇仙子靈
境那知難再逢塵緣未斷思鄉里歸來但見七世
孫舊遊零落知誰存人間歲月等飛鳥浮生頃刻
何須論我來弔古尋遺跡祠廟荒涼翳荆棘
棘逝水東流去不回桃樹年年自春色

回向廟

嵯縣志在會稽界為德政鄉祀社之所

自鄭

強回向廟記神姓陳諱德道生於東漢孝和之元
年至四十時忽語人曰今日予生辰即死辰也當

為汝鄉之主是夕果無疾而逝隣居聞鼓吹聲不絕羣駭之因憶其言構椽於蔣岸橋之岡南向以祀水旱祈禱輒應後赤烏二年一夕風雨驟作如萬騎雜遝曉視之廟東向矣遂題其額曰回向廟顯應廟 嘉泰會稽志在縣西四十里祠初建於赤烏二年神嘗為令此邑有惠政廟食於此歲久失其姓宋宣和辛丑睦寇起蔓延旁境剽縣屠戮尤酷一夕四山旗幟車蓋隱隱出入雲間賊徒忽驚呼曰天兵至矣遂自相攻殺鄉人復築廟宇紹興十一年賜額顯應封靈祐侯

葛仙翁祠 萬厯紹興府志在太白山有丹井藥竈

許岳英葛仙翁祠詩斷崖崔巍天驥騰虛明倒影
勢欲崩太陰生寒激山籟微茫烟水涵青冥遠峯
堆瓊搏霄漢芙蓉城高錦雲亂殘紅稚綠春尚濃
綺戶_附林半當年仙子遊無方釣車足跡名
殊鄉世傳得魚化龍去千年遺事歸渺茫雲烟蔽
虧張穹灝斷碑龍文近丹竈偶來靡履步山椒雨
袖風生漫吟嘯

嶧浦廟 寶慶會稽續志在縣北四十五里神姓陳

名廓睦州青溪縣人嘗為台州永安縣令始過此
見山水勝絕陰有卜居之意秩滿再經忽舟覆溺

死自爾靈顯民遂祠之稱為陳長官廟晉天福初

有神兵之助封為上善濟物侯

樓鑰嶧浦廟記刻溪兩山相向西曰

嶧山巨石突踞水上其下曰嶧浦巖壑奇聳尤為勝絕淵渟激激不知為幾尋丈相傳中有神物無敢觸犯上善濟物侯廟夙著威靈據山瞰溪稱其為神明之居舟楫所經無不致敬廟有吳越時公牒稱陳長官祠嘉祐七年何淹作記云侯為台之仙居令過此溺死自爾靈驗民遂祠之天福初受封然鄰道元之注水經出於後魏已言嶧山北有嶧浦浦口有廟甚靈驗則廟已古矣況台州樂安縣五代時改為永安景德四年始改為仙居不應石晉之前已有此名豈侯實為永安縣令後人誤承仙居之名耶傳記亦有謂靈祠間有以剛方之士代之者惟其血食有素授職於朝故封爵之報

與臣子不殊也建炎元年金兵入越欲犯邑境以神之威不戰而退乾道嘗賜香茗之奠今丞相謝公布衣時由丹邱赴南宮神已告之富貴之期既登科作尉此邑事之尤謹公既登樞筦修職魏君必大率邑人以加封為請慶元改元賜廟額曰顯應公之力也魏君年及八十新其祠而鎬之子浦為丞介以請記乃為記之

靈濟侯祠 岷縣志在縣東門外百數十步故有祠在浦橋明洪武十七年增建於邑之南門成化二年知縣李春重葺十三年縣丞齊倫拓大之嘉靖二十三年詔春秋崇祀三十四年知縣吳三畏徙

今所萬厯十五年知縣萬民紀更拓之

宋寶祐元年秋兩浙

洪水為患尤深幸錢塘潮神靈濟侯大顯神通逆風退浪不壞民居不傷民命祠宇臨江水波不入嚴衢近郡亦賴保全是用重褒封號旌異靈聰宜改靈濟侯為善應侯載諸祀典俞浙靈濟侯祠記刻之浦橋有神曰陳侯諱賢者生於乾道戊子歿於紹定庚寅既歿禦災捍患所在響答侯生能為神不問晝夜遇假寢輒神遊江海間拯護舟楫嘉定庚辰潮怒齧堤手一竹植沙塗上誓之曰神有靈無使潮越吾竹以為神羞潮至望竹伊邇即勢伏迢運折而東行未幾西岸擁沙成阜畚鍤就緒而長提屹若山繞矣一日郊之鄉丈人趙公炎來道侯之孫某將築亭墓上奉祀事求文為記吾少時舟行浙江中流浪湧篙公仰天呼侯數四浪輒平舟獲善濟吾時常有祈禱之語久未克償遂為

之記

王烈婦祠 紹興府志在清風嶺烈婦臨海人宋末

為元帥所劫乃嚙指血寫詩山石上投崖下死血

漬入石至今天陰雨則儋起如新有司春秋祭

楊維

楨王烈婦詩天荒地老妾隨兵天地無情妾有情
痛血嚙開霞嶠赤啼痕化作雪江清能從湘瑟聲

中死全勝胡笳拍裏生三月子規啼盡血春風無
淚寫哀銘張翥王貞婦詩清風嶺頭石色赤嶺下

嶠江千丈黑數行血字尚爛斑雨蕩霜摩消不得
當時一死真勇烈身入波濤魂入石至今苔蘚不

敢生上與日月爭光品千秋古石化為碧海風吹
斷山雲崩可憐薄命良家子千金之軀棄如土古

來喪亂何處無誰肯將身事他主兵塵湏洞迷天
台骨肉散盡隨飛埃楓林影黑寒燐墮精靈日暮
空歸來堂堂大節有如此正當廟食標崔巍君看
崂江之畔石上血真與湘江竹上淚痕俱不滅

國朝康熙五十七年巡撫朱軾檄紹興知府俞卿重修

忠義節孝祠 忠義祠在學宮東側節孝祠在縣治
百步街之東

國朝雍正五年知縣張秘奉文建

新昌縣

先農壇 在東郊外

國朝雍正六年知縣李之果奉文建立壇宇并置藉田

四畝九分

社稷壇 萬厯紹興府志在縣西北一里

風雲雷雨山川壇 弘治紹興府志在縣南百步

邑厲壇 紹興府志在縣東北一里

城隍廟 嘉泰會稽志在縣西一百五十步成化新昌

縣志宋封崇福侯元至大元年縣尹李承事重建

元末燬於方氏明洪武二年知縣周文祥因舊址

併舊尉司址重建成化十一年知縣李楫重修

劉阮廟 萬厯紹興府志在十一都採藥徑祀劉晨

阮肇

保應廟 成化新昌縣志在十四都宋寶慶二年鄉

民楊大春等狀稱有隋諸生避難沒葬其地水旱

疾疫禱輒應民請祠之遂賜今額

董泰初保應廟詩廟食空山八

百年衣冠猶是李唐前汴河十里垂楊柳何似松陰數畝田陳東之保應廟詩投迹空山計已非江都消息亂來稀廟前幾種青青草錯怨王孫去不歸

吳府君廟 成化新昌縣志在二十一都神姓吳名
元之仕唐守越後居剡西今為永福鄉既沒葬於
上黃院

止水廟 紹興府志一名捍患祠舊在東堤上宋紹
興中知縣林安宅寶祐中知縣趙時佺俱築東堤
有功民為立祠明成化間侍郎俞欽征川貴山賊
夢二人語曰明午當助風次日交戰果反風克勝
歸即崇飾廟貌以報其功嘉靖二十三年知縣萬

鵬築城改遷城內易其額曰東鎮

黃壁止水廟詩步八東溪路翹

瞻令尹祠築堤前日事止水後人思畫永官無事秋成民不飢喬松看合抱應是手親移

石子重先生祠 嘉靖浙江通志在鼓山書院中歲

以丁祭後祭新昌縣志祀宋儒石塾

傳詳儒林

陳宣慰祠 萬厯紹興府志在城隍廟西元至元中

建祀浙東宣慰陳恬

俞浙陳宣慰祠記公字慶甫河南府人至元十四年以浙

東宣慰從百餘卒來自福建抵新昌隣境婺之玉山多悍夫先是有欲逞悍於一使者呼儔五百輩約便道為邀害計風傳來期適與公值邑人白公寇鋒必銳少避之公曰吾宣皇靈慰民望以為職

不幸遇寇弭寇可也避寇可乎縱吾可避百姓魚肉不上負朝廷羞使節乎况寇亦吾民也吾將導揚天子德意昭示禍福使知向背以盡吾職無愧吾心而已即留止縣治翼日寇至公肩輿招諭罄囊勞之寇認為前使者喧呶洶湧不復聽命擁衆直前公遂死焉寇覺其誤驚駭鳥散嗟乎公以赤子視寇寇不以父母視公公為寇開生路寇乃納公於死事之倒施有如此者非命也耶公既死邑人壯而祠之閭二十有八載邑大夫王光祖求文為記因發明其事以表見於當世云

何鄉德祠於越新編在東城外祀明尚書何鑑

石性

何鄉德祠記大司馬新昌何公有大惠於鄉今即其所可見者言之新昌之東有古防焉湍水歲鰲決而厲民公謀之藩郡增築高廣邑之田賦汨於豪姦小民貿貿焉不知所如則鬻家以償公議度

而籍之諸弊頓息縣治居萬山中留都之稅疲於飛輓公議擬溫台改輸近郡邑有社倉去城阻遠民弛於防則蠹日滋令質之公移置近邑所徃役省而防閑便舊制邑三十有二里公以民貧議歸併十之一邑東南接溫台道路時壞於洪水往來病涉公始議結石為周行餘二千步又建傑閣以壯八鄉之觀弘治癸亥大祲民有菜色公議上請得蠲租賑恤賴以活者甚衆他如議免軍需而遞送省裁革冗簿而費用節請除府庫之役而窮困始蘇凡所以益於國而利於民之政不可悉舉宜鄉之人廟貌而頌祝之役世而不能忘也

忠義節孝祠 忠義祠在學宮內西隅節孝祠在學

宮外興賢坊右

國朝雍正六年知縣葛大梁奉文建



浙江通志卷二百二十一

欽定四庫全書

史部

浙江通志卷二百二十四

二至

詳校官給事中臣戴璐

檢討臣德生覆勘

總校官編修臣倉聖脉

校對官學正臣湯垣

謄錄臣監生陸鼎

欽定四庫全書

浙江通志卷二百二十二

祠祀 六

台州府

臨海縣 附郭

先農壇 在東郊崇福堂

國朝雍正六年知縣陳鵬鑑奉文建立壇宇置耜田四畝九分

社稷壇

赤城新志在郡城西一里

舊浙江通志附郭不別置餘縣

制如

風雲雷雨山川壇

赤城新志在郡城東二里

郡厲壇

臨海縣志在城東北

城隍廟

台州府志在大固山東北唐武德四年建

祀吳尚書屈晃子惠坦吳越時封興聖永安王宋

建炎三年封顯佑侯四年加通應慶元二年進靈

濟公嘉定元年進順利王明洪武三年止稱城隍

之神修建姓氏無考

國朝順治間知府郭曰燧高培前後增修康熙五十八

年知府張聯元重修

臨海縣城隍廟 台州府志在縣治東北一百步

德淵廟 赤城志在縣東北五里法安院側祀白龍

潭崇寧五年令樓君明改壇而建政和五年賜今

額建炎四年封滋榮侯時禦海赤頰碧瀛湫水四

潭同被侯封俗所謂五龍是也

文昌祠 舊浙江通志一在佑政廟右一在白雲山

一在中子山

靈康廟 赤城志在縣東南二十里白鶴山祀東漢

趙炳

唐仲友白鶴山靈康廟記白鶴山有廟曰靈康其神曰靈順顯祐廣惠王漢人姓趙諱炳

字公阿生於東陽行於烏傷死於章安人為立祠於山之趾未有知其所起者自太平興國暨慶厯間繼顯靈異元豐賜額崇寧始封侯大觀進爵政和錫王號宣和建炎增衍鴻名以迄於今仲友奉命來守以淳熙辛丑歲正月丁巳謁於廟行視棟宇漏腐傾歌像設圖畫漣漫剝落念承歎歲方急救饑幸得中熟當議補葺越六日癸亥乙夜城南火西風急將及城閨仲友率官兵撲滅遐禱於神

須臾風轉西北城獲全六月不雨復以丁巳祈於廟畢事登舟有雲如練自前山覆廟上急雨俄頃止薄暮大雨旬日霑足既謝神休即計工費命臨海令陳處俊主簿向士斐董其事易敝而新堅壯工緼經始於八月乙巳落成於正月丙午距宣和復建六十年矣自茲以往民之事神不懈益虔章得象靈康廟詩白鶴何年入紫氛空遺靈跡廟猶存巖崖暗鎖雲根老堂殿陰連海氣昏潮上神烏鳴祭鼓夜深鬼火照祠門遶天歸歎桑田事應似麻姑仔細論

關帝廟 台州府志一在崇和門內一在崇和門外

一在楊巷一在衛前一在西門外一在縣前一在

宴海樓

孔相公廟 赤城志在縣東一十八里祀晉孔愉紹興二十八年重建臨海縣志愉避亂入臨海山中既没人立祠祀之愉常為左僕射故稱相公

蕭長史廟 赤城志在縣西北一十里祀梁時守蕭洽台州府志唐貞觀二年立

鄭廣文祠 明一統志在府治東祀唐台州司戶鄭虔虔嘗為廣文館學士貶此明正統十二年重建台州府志虔以文章化俗沒後台人即所居祠焉

錢越王祠 台州府志在白雲山資善堂東祀武肅

王錢鏐附祀宋守錢暄明嘉靖十七年建

義靈廟 方輿勝覽宣和中盜發仙居戶掾滕膺帥

厲吏士濟以方畧寇不為患父老立祠於郡側山

上 朱子義靈廟記慶元元年春正月勅以台州士

民所請故直祕閣滕侯之祠為義靈廟台人老

稚聞是命下驚喜歡呼奔走迎拜導至祠下酌奠

以告大書扁榜金朱焯煌揭於門楣廟侈上賜而

其耆父學士大夫葉君聖耦等四十餘人亦會祠

庭相與言曰往歲盜起幫源連陷六州戎毒所加

民無噍類而吾台人獨得全其室家仰父俯子傳

世不絕以至於今者滕侯力也沒而勿祀固無以

慰吾民之心祀而勿命又無以彰吾侯之德今則廟事既修而亦幸蒙上恩列祀典矣顧無牲石以彰始末其何以昭報事於長久且當日棄城冒賞之人其子孫猶有存者蓋嘗肆其妄說強附其祖以遂侵誣之計吾台之人亦斥其偽以控於朝而報紕之矣然久而不傳則未敢必其無後患也乃以書來請撰其事熹以衰朽欲謝不能而復自念往使浙東留台最久固已熟聞茲事而有感於中矣矧以諸君之請之力其何可辭按台人前進士陳君思恭所為日記及故禮部侍郎陳公公輔諸人之銘序贊頌皆言聞亂之初闔郡震恐太守趙咨道郡丞李景淵咸愕眙不知所為謀欲遁去他吏相顧亦無敢出一語者侯方司戶曹事乃獨慨然請任其責有異議者輒面叱之即日移書設其父母昆弟而閉其妻子於官舍悉召州人諭以利害人人感泣踴躍聽命乃急下令發夫守險增埤

審隍除器募兵積糧致用分屯列柵為死守計日夜循撫甘苦同之城中之人始有固志而守丞以下則皆已遁去久矣既而山民呂師囊兵起應賊號十餘萬導以攻城前後數四侯皆應機設械立摧破之手弓臨城殲渠帥賊遂退走卒全其郛凡所存活以十萬計叅伍其說一無異辭是則侯之為烈彰彰明矣獨稽史籍則見當時實以守城破賊為丞之功進領郡符就加職秩乃與所聞不類而於妄說反有助焉於是更即諸書以求其故然後乃見當時守丞雖遁而侯獨於所下文書猶必存其位號寇退解圍迎丞以歸俾上功狀而已不預焉丞蓋熙豐故家諸子又皆貴仕故得獨冒顯賞塵策書而侯反下從捕盜七人之比僅改京秩初階移官旁郡以去是閤尹擅兵賊臣柄國之所為而後未侵誣妄論所由起也一時之謬流惑萬世向非台之文獻有足徵者民吏稱思久而不

念則亦何所質正而決其是非哉嗚呼是又可歎也已侯名膺字子勤後保南都守陳蔡以抗強敵乘勝鏖銳之鋒勲績尤盛勸進大元帥於濟州所陳又皆當時天下大計切中機會其於建炎紹興之史法當立傳而棄於是書蓋嘗受詔參筆削矣是以因書此碑而并覈其真偽如此不惟少塞台人之意亦使後之執筆者有以考焉廟數遷徙今在西北隅永慶寺東實侯所再築而力戰破賊處台人迎侯繼室趙夫人及諸孫仲直等使居其旁通判州事呂君祖儉為買田以資奉守未就而去談者惜之然以台人之德侯如此吾知其繼而成之者無難也

陳惠王祠 台州府志即鎮寧廟在府治東祀宋名

臣陳瓘臨海縣志瓘徽宗朝為權臣所忌徙台州

既歿多顯應郡人祀之

謝上蔡祠 嘉靖浙江通志在上蔡書院中祀宋謝

良佐歲春秋祭

葉適謝上蔡祠堂記謝顯道受業二程共遊酢定夫楊時中立皆為

高弟號上蔡先生學者宗其傳謂顏冉復見也不幸遭黨人禁錮未解而卒諸子避難進逸一死楚一死閩獨克念者流落台州紹興六年給事中朱震子發奏官之尋亦死克念有子偕偕三子無衣食替人承符引養老母嘉定五年太守黃嚮子耕修郡志訪求故家得之請見抗宿主禮給冠帶錢米買田宅祀顯道於學在二程後

十賢祠 臨海縣志在舊普賢寺基祀宋徐中行徐

庭筠石墜潘時舉趙師淵杜良仲杜知仁杜範車
若水黃超然等十先生明嘉靖十九年御史周汝
員同知朱世忠建

李忠襄祠 臨海縣志舊在天竺院祀宋李顯忠紹
興中忤秦檜謫台州今徙本縣城隍廟側

朱文公祠 台州府志在北固山上明弘治間郡守

方良節改元妙觀為祠正德間郡守徐鵬舉奏請

春秋祀之

徐鵬舉建朱文公祠記台之晦菴文公
朱先生燕居也先生嘗主管台州崇道

觀按宋孝宗時浙東大饑先生受命提舉釐革不
便修舉荒政於台奏蠲丁絹寬民逋負諭禁陡門
勸立社倉開濬河溝築閘十二又修築海濱隄塘
利澤及民也溥台民至今德之兩主管台州崇道
觀講明道學以淑台人號稱文獻台士又甚德之
台人飲食必祭旱疫必禱病祠未建乃言於前守
方君良節斥舊觀屋宇立於觀基下三級改作文
公祠鵬舉來守台莊嚴藻飾扁以晦菴蓋先生自
言在台甚久其春戀於台必矣建菴於是庶
神有所棲而台人不忘之心其亦有所慰矣

國朝康熙十年同知劉源溥教授何且純徙今地

文信國公祠 台州府志在縣東北僊巖嶺上明嘉

靖四十二年建祀宋丞相文天祥以黃巖杜澣臨

海張和孫併泰和胡文可太平呂武配因德祐二年公自北亡入海泊舟山下之城門村宿和孫家而杜胡呂三人皆從行者故併祀之

崇節廟 赤城新志在臨海縣東南六十里元末總管達兼善與方國珍戰死於此順帝命立祠祀之賜今額

八忠祠 臨海縣志在龍顧山明嘉靖元年郡守羅僑建

國朝康熙十六年知府高培同知祖進朝通判王大倫

重建

洪若臯八忠祠記八忠祠者祀建文死難八人其一為寧海方正學次則葉惠仲臨海人

王叔英太平人徐庠黃巖人鄭華臨海人盧原質寧海人鄭恕盧迥皆仙居人當日祠堂位次不以官不以地不以死事之先後或論齒云祠初名忠節又名九忠蓋附東湖樵夫也續祀樵夫於湖亭故名八忠祠

謹按王恒叔廣志繹謂寧海林嘉猷鄭公智皆生方黨死者應在祀典而不及是遜國忠臣台固不止八人也

方正學祠 臨海縣志在北山百花橋

國朝順治十七年徙府學康熙十一年郡守岳貞教

授何且純重修

樵夫祠 台州府志在東湖上祀建文時東湖樵夫

傳詳忠臣侯濬東湖謁樵夫祠詩采樵無復白雲
邊便把網常一擔肩楚澤已沉波寂寂殘碑半蝕
草芊芊縱君甘作無名士自古誰為不死
年此日新祠湖上路長堤點點綠楊烟

陳恭愍祠 臨海縣志在龍顧山祀明布政使陳選

舊為丹崖書院正德十六年郡守羅僑奏改為祠

金賁亨重修陳恭愍祠祀丹崖書院陳恭愍先生
昔所藏修以薰及其家若邦之子弟者也先生歿

有司暨邦人隨即而俎豆焉既而毛給事憲請於朝錫謚建祠郡守羅侯僑爰拓故址崇構維新嘉靖丙申柱史張公按浙省屬今守許侯繼翻刻先生小學句讀以傳復命別駕林侯鏢相厥垣宇而重葺之

名勲祠 台州府志在三清察院司後祀明雲南布

政戴德孺萬曆辛丑年建德孺協平宸濠之亂後補雲南右布政使行至彭城遭風卒以少卿黃綰言祀名勲祠

愍忠祠 台州府志俗稱六府祠在巾子山上祀明

死難知事武諱嘉靖三十七年建

彭應壽忠祠詩武侯昂昂七

尺軀英風猛氣真丈夫為官台州祿五斗丹心凜凜白日俱憶昔東海翻長鯨海濱白骨啼空營登

壇秉鉞何為爾閉城縮首無戰情武侯仗劍輕車逐手斬倭頭血濺腹伏兵俄起震陵谷瞋目大罵

侯勢促武侯儒家子市兒烏合兵後救都不至倉皇捐此生滿城父老俱流涕挿竹再見雷陽祭嗟

傷侯今日死為誰侯死城完功不細九重遣奠些音傷賜額建祠大道旁香烟不斷松陰滿朱旗白馬

時朝翔

周公祠

舊浙江通志在靖越門內祀明邑令周家

棟

蔣司理祠 台州府志在府治北祀明司理蔣鳴玉

王烈婦祠 赤城新志在府東南三十步弘治三年

馬守岱建又於死所姜巖側亦立祠焉

傳詳列女

雙節祠 舊浙江通志在嘉爵橋祀范節婦張氏妾

屠氏明萬厯中建

傳詳列女臨海縣志祠前嘗生叢草無春冬皆榮

葉烈婦祠 臨海縣志在大井頭南祀烈婦張氏明

萬厯十四年建

傳詳列女

忠義節孝祠 忠義祠在縣學內節孝祠在白雲山

下

國朝雍正五年知縣陳曷鑑奉文建

黃巖縣

先農壇 在小南門外印山前離城一里

國朝雍正五年知縣李淑端奉文建立壇宇并置耜田

四畝九分

社稷壇 赤城新志在縣西隅

風雲雷雨山川壇 赤城新志在縣南隅

邑厲壇 赤城新志在縣北隅

城隍廟 台州府志在縣治東三十步始建無攷宋

紹興三十年令龔滂重建元大德五年修

林昉黃巖州城

隍廟記黃巖故有城隍廟於縣治東吳越時封永寧侯入宋賜廟之額曰顯衛端平乙未宰辛安世斥新焉又十有一年當淳祐乙巳更封廣靈侯侯之陰功載在命誥又七年而封侯之父曰啓祐侯然皆不明言其姓某諱某皇元考地計籍壯黃巖之賦登建為州城隍有神亦宜承詔出百縣上而廟獨猥仍其故非所以嚴體貌聳觀瞻也況昔之隆者撓華者漫立者腐不支靈莫於妥尚望其涖此土庇此民乎於是州人鳩材僱工宏朔寢廟次聖父殿次寮屬左右序次門樓中為永寧閣大小

總一百五十有六楹營於大德辛丑之乙卯建於六月之巳丑落成於十月丙寅朔明洪武

九年李令震亨建成化丙午燬鄭令達復建萬厯乙亥署縣事李通判果重建袁令應祺成之

國朝順治間重修

三賢祠 黃巖縣志在學宮宋寶定二年朱令日新建祀謝伋葉適徐中行

朱文公祠 黃巖縣志舊在縣西北明嘉靖丙辰汪令汝達毀縣南禦崇院改建以邑之及門高弟趙

師淵杜華杜知仁林鼎林鼎趙師夏趙師雍趙師
歲趙師端杜貫道池從周一十一人配春秋二丁
後致祭

國朝康熙丙子年劉令寬重修

杜清獻公祠 台州府志宋淳祐間建祀丞相杜範

明弘治間黃公印重建於杜黃嶺墓側嘉靖庚子

朱同知世忠毀山神祠改建

黃中德杜清獻公祠
堂記竊觀漢唐以來

以勛業文章居相位者代則有之未聞以道學登
台輔若宋丞相清獻杜公之為人者公以淳熙元

年十月生於杜曲里淳祐五年四月薨於位還葬於本縣靖化鄉杜黃嶺之原予惟公以道德名節冠前朝以勛業文章垂後代蓋自趙抃之後諡清獻者一人而已廟食百世誰曰不宜

甘棠遺愛祠 台州府志在縣治東祀明周守志偉

黃綰甘棠遺愛祠記嘉靖二十年秋七月庚子台南海中羣龍交鬪風雨如傾洪潮驟溢瀕海諸邑惟黃巖為甚黃巖惟近海諸鄉為甚吾郡太守陽山周公聞而亟走黃巖躬視哭所問其存亡掩其醜略哺其饑餓遂疏於朝請賑乞減今年田租民咸德之乃立祠邑治東周公宇士器南康人陽山其別號也

百里瞻依祠 台州府志在縣治東嘉靖甲寅邑民

以高令材有惠政建祠祀之

忠義節孝祠 忠義祠在學宮內鄉賢祠之傍節孝

祠在城內尚書坊之側

國朝雍正四年知縣李淑端奉文建

天台縣

先農壇 在東郊界牌

國朝雍正五年知縣張若震奉文建立壇宇并置耤田

四畝九分

社稷壇 台州府志在縣治西南一百步

風雲雷雨山川壇 赤城新志在縣東南三百二十

步

邑厲壇 天台縣志在縣北馬公廟後

城隍廟 赤城志在縣北二百一十步舊在縣東吳

越時封始平侯宋宣和二年徙今地赤城新志明

洪武二年縣令鄧林重建

國朝康熙十一年知縣趙廷錫重修

峇山廟 赤城志在縣西五十里本龍王祠吳赤烏

二年建

清聖祠 天台縣志在桐栢山祀伯夷叔齊二像明

建

蕭文清清風祠記余遊天台桐栢宮入法堂見夾室有二石像衣冠甚古叩其石甚堅緻背有

古篆字拂塵視之一曰伯夷一曰叔齊予問所從來道童曰相傳趙宋時宮有黃道士者知醫宣和天子召治母后疾疾愈官之辭賜之金帛辭獨乞此二像載以歸予聞喟然乃求隙地得二丈餘高明爽塏松筠交蔭可作室以庇像以語鍾令

令欣然從事又白太守譚公題其門曰清風

國朝康熙五十六年知府張聯元奉檄重建更名清聖

張聯元清聖祠記余尋桐栢觀舊址旁有茅舍一間供奉伯夷叔齊二大石像中空外潤背篆分明高古端嚴凜凜有生氣道書載伯夷叔齊為九天僕射治桐栢山宋時建九天僕射祠至明改建清風祠今制府滿公以桐栢山係祀古賢名勝之區亟宜修建大中丞朱公改題清聖祠旁以司馬丞配禎

元應善利真人祠 天台縣志在縣西天慶觀瓊臺

之左赤城志祀仙人王喬淳熙九年唐守仲友建

劉阮廟 赤城志在縣西北三十里雙闕下元祐二

年建世傳二仙所至即其處

徐文肅祠 台州府志明洪熙元年念左贊善徐善

述輔道守之勞勅建祠墓側春秋祀之

方侯祠 舊浙江通志在城隍廟西祀明邑令方印

陶望齡方侯祠記公字與信弘治癸丑以鄉進士
來知天台明年暴卒篋俸八百錢耳民爭致賻以
斂斂畢謀繪像弗逮而鄉民故多生繪像奉於家
以幘來擇尤肖者而歸之民為巷哭罷市踰年躋
祀於名宦又共為歌詩以哀之既而謀作專祠未
果公元孫今御史大鎮來按浙嵯與祠事會既愴
且慕省厥工不煩重父
老佐之以廩餼祠遂成

忠義節孝祠 忠義祠在縣學內節孝祠在縣東大

街

國朝雍正五年知縣張若震奉文建

仙居縣

先農壇 在東關外

國朝雍正五年知縣呂賓裔奉文建立壇宇并置耜田

四畝九分

社稷壇 赤城新志在縣西二里

風雲雷雨山川壇 仙居縣志在東郊之南

邑厲壇 台州府志在縣北郊外

城隍廟 赤城新志在縣治東六十步明洪武三年

縣令王從古建

國朝康熙十九年重建

佑聖真君廟 赤城志在縣西二里淳熙十二年建

蒼山廟 赤城志在縣南四十里祀吳將軍朱剛赤

烏元年建

慈感廟 仙居縣志在縣北六里祀杜氏二女嘉靖

十六年以鄭氏二女配改曰四烈女祠

張儉慈感廟記吾邑

去西北三十里曰孟溪唐天寶中建貞女祠祀杜氏二女即其死所也每歲旱禱雨輒應宋宣和中民避寇其間寇望山中草木皆為兵畏不敢犯民德之別建慈感廟於五里之內以便供祀至嘉靖丁酉郡貳守朱公按邑建雙忠祠祀靖難忠臣盧鄭二公以鄭二女禮弗同享徙以配杜氏二女顏曰四烈女祠獎忠節也祠初隘陋公拓其周垣大其寢室又置前堂為士大夫瞻拜之所不勞力重費踰時一新而四女之烈家聞而戶曉矣公名世忠字良弼歷官咸著顯蹟此其緒餘云

六賢祠 台州府志在文廟西廡祀通判蔣旦特進

陳庸龍圖吳芾待制郭磊卿侍郎鄭雄飛縣尉吳

諒

古靈祠 嘉靖浙江通志祀宋縣令陳襄舊在戟門
西嘉靖初徙南峯山

三處士祠 仙居縣志在南峯上古靈祠左祀宋處
士林訪呂徽之翁森

趙長官祠 台州府志在安洲驛右祀宋令趙善惠
趙主簿廟 仙居縣志祀里人趙時栗宦鹽官死元
人之難立廟祀之

忠烈廟 赤城新志在縣南元吳仲修為黃巖州同

知處盜來寇與戰不屈而死故祀之

虞俊明忠烈廟記至正十

三年台城兵變郡監聞公有氣節遣使禮聘公力辭弗就勉之再四乃起署事黃巖州判官分守台城至正十六年春處州睦寇起將犯仙境遂陞公同知州事總制其鄉之義兵公慨然曰吾今為王臣矣當勤王事況仙吾父母邦也捕之其可後乎即合鄉兵數千人奮躍而往禦戰於羅漢潭賊危困不敢進鄉民吳奉一者陰為賊向導賊乃凌晨突圍襲其不備官軍倉卒多散去公獨披甲上馬與戰手刃數十人而賊衆潛掩其後遂遇害事聞立祠於邑南狀元坊擇地七百武度材鳩工祠成塑公像有司復上其事贈公台州路黃巖州知州表其廟曰忠烈

雙忠祠 台州府志在縣治西北隅明嘉靖間建祀

忠臣盧迴鄭恕

應良雙忠祠記仙有二忠臣焉曰戶部侍郎盧公迴蕭縣令鄭公恕

嘉靖丁酉九月郡貳守朱侯行縣至仙縣廨西有妖祠侯立命撤之即其地建新祠祀盧鄭二公復表諸通衢曰雙忠祠二公皆仙之二十六都人盧公於方正學之門從遊最密其死也在壬午夏六月亦與正學同時鄭公壬午夏靖難師至率鄉兵拒戰敗而南奔尋被獲以八月十七日誅二公之官守有大小世裔有興滅事迹有顯晦而要其精忠大節無異轍焉

馬公祠

仙居縣志在學宮西祀明令馬濂

傳詳名宦

烈女祠

台州府志在縣治北明萬厯間建祀烈女

顧惜寶及使女阿香

傳詳列女

忠義節孝祠 忠義祠在明倫堂東側節孝祠在西

門城內

國朝雍正五年知縣王立常奉文建

寧海縣

先農壇 在東郊外

國朝雍正六年知縣黃光岳奉文建立壇宇并置耤田

四畝九分

社稷壇 台州府志在縣西二里

風雲雷雨山川壇 萬厯寧海縣志在縣南一里

邑厲壇 赤城新志在縣治北一里

城隍廟 台州府志在縣東南二百步唐武德中建

宋紹興二年令薛抗修明成化間令郭紳拓而新

之

楊文卿寧海縣城隍廟記寧海縣治東百步城隍廟在焉廟之建昉於唐武德中吳越時封廟

神為安仁侯宋隆興初令薛抗為之改創入元隳廢明正神號曰寧海城隍之神廟至今百年於茲矣廊廡圯壞地為居民所侵雖其廟獨存隘陋亦甚成化十二年宜陽郭君紳來知縣事顧瞻惕然

相規度勢復其民所侵之地撤其舊所有之宇而新之訖工規模壯偉士庶具瞻

梅長者祠 台州府志在丹邱寺前宋淳祐中建祀

流寓梅盛

方孝孺梅長者祠堂碑記台之寧海有梅氏考之圖譜昔有諱盛字昌國者仕

晉為章安令擢南昌別駕知晉將亡即是邑而隱焉常誦佛書而有靈鳥降其所居之側若諦聽者歲餘始知郡縣以為鳳集上其事宋文帝聞而下詔褒之上表稱謝曰此殆覽陛下之德輝耳臣何與焉帝咨嗟稱為長者仍命郡縣闢其所居舍為丹邱寺云今八百餘年矣其子孫衆多為邑巨家而寺亦不廢宋淳祐中諸孫之學佛者良阜建重閣像而事之歷年雖久而未有記其事者夫以劉宋立國未數十年而宗社為墟長者之傳今千載而猶未艾此其所為之可稱豈特一言之善哉祠

而奉之使聞長者之風者去浮薄而趨忠厚豈不足為天下勸乎

李太尉廟 赤城志在縣西北五十里祀唐李光弼
宋建炎中重建台州府志唐袁晁據浙東李光弼
擊斬之晁弟瑛從五百騎遁入紫溪洞中光弼駐
兵洞口絕其糧道其徒皆餓死居民感其德為立
祠

陳長官祠 萬厯寧海縣志原在學宮西今改移縣
治東妙相寺前祀五代賢令陳公

毛馭續修陳長官祠記長官姓

名無考寧人世以長官稱之當吳越王據東浙雄并天下謀益賦於民以是國餉十倍獨長官治寧弗受脅抗羊毛二使詞甚激意可使一身被殺慘毋令百姓苦萬世二使怒竟死諸獄中事上王感悟遂罷寧賦故寧賦無重徵者長官惠也僉謀以祀正德庚辰適余來寧士民以事狀白余而壽官黃鎮泰練直以身任董事之責余曰祀之立廟以存忠義表賢節而報功德者也況今之祀又出於人心之同然者乎遂卜宅畧基於妙相寺之右量工命口不數月而考成焉

赤城先生祠 赤城新志在寧海吉祥寺東祀宋羅

提刑適

洪忠宣公祠 台州府志在梁王寺前忠宣嘗為寧

海主簿故祀之子适復為台州通判

方氏祠堂 萬歷寧海縣志在縵城里洪熙中建祀
方正學父子尋為民人所侵成化中知縣郭紳反
所侵地重建

正學祠 寧海縣志原建卧龍山明隆慶六年巡撫
謝廷傑檄所屬修葺萬歷三年郡守李時漸移西
門內知縣曹學程修崇禎壬申知縣宋奎光重修
忠義節孝祠 二祠俱在東郊外

國朝雍正五年知縣黃光岳奉文建

太平縣

先農壇 在東門外

國朝雍正四年知縣戴世祿奉文建立壇宇并置耜田

四畝九分

社稷壇 太平縣志在觀海門外半里

風雲雷雨山川壇 台州府志在縣治東

邑厲壇 太平縣志在仰山門外鳳凰山下

城隍廟 赤城新志在縣東五百步明成化五年知

縣常完建

烈士祠 台州府志在第一都谷魯明知縣曾才漢

為溧陽教授林夢正建

傳詳忠臣

忠節祠 太平縣志在皇華亭北祀明翰林編修王

叔英

傳詳忠臣

台州府志萬厯間同知朱世忠建題曰

忠節又建貞烈祠於右以祀金夫人併二女焉

袁公祠 赤城新志在太平縣東南四十步弘治二

年邑民陳儒敷等以前令袁道有善政立祠祀之

傳詳
名宦

烈婦祠 台州府志一在縣治東北二百步明郡守

羅僑檄縣建以祀林烈婦薛氏一在縣治西三十

五里知縣祝弘舒建以祀朱烈婦吳氏

傳詳
列女

忠義節孝祠 二祠俱在東門直街

國朝雍正四年知縣戴世祿奉文建

浙江通志卷二百二十二